

Gecomitteert Joncker Gillis Martselaer, Joncker Willem Borrewater, Schepenen, ende Meester Willem Martiny, Gref-fier respectie deser stadt, omme gesamenderhandt hen te transporteren ende te compareren neffens Syne Excellentie, ende Syne voors. Excellentie te remonstreren ende vuyten name ende van wegen deser stadt te kennen te geven dat alsoo Marten Neyen by acte vande Weth alhier is gecomitteert tot het verhueren ende benefitieren vande huysen, erven, plaetsen ende materialen gestaen ende gelegen inde casteel-plaetse alhier, ende den eedt gedaen heeft om tselve, nae syn beste vermoigen ende tot meesten proffyte deser stadt, te volbrengen ende hem voorts in als soo quyten ende dragen dat deselve stadt mach ghestaen neffens dengenen die daerinne soude moighen bevonden worden gerecht te syne, ende dat onder andere vande articulen der instructien hem byde voors. stadt desen voors. dienst ende offitie aen-gaende gegeven, hem by het Ve articule wordt belast alle parsoonen, soo in dienste van Syne Excellentie wesende als ander vanden ghevolge, een, twee oft meer huysen ende cameru ingenomen hebbende ende deselve bewoonende, te doen delogeren in mindere huysen ende plaetsen, om alsoo by goeden ordre, nae comoditeyt ende bequaemheyt der plaetsen, eeneniegelyck soo vanden edeldom, domesticquen, garde als anderen gevolge, elck nae qualiteyt des parsoons, nae vermoigen, rontsomme den huysen ende wooninge, daer nu ter tydt Syne voors. Excellentie gelogeert is, metter tydt

ende beste opportuniteyt gelogeert te worden, ende oyck dese voors. stadt (mits verhuerende derselver huysen ende plaetsen,) proffyt daervan tot onderhoudinge derselver soude moigen genieten, ende want denselven Neyen groot obstacle, beletsel, diverse injurien ende dreygementen int exerceren ende bedienen van synen voors. last ende offitie, by sommige soo domesticquen, helbardiers als andere officiers van Syne voors. Excellentie, dagelycx aengedaen wordt ende alsoo nyet sonder peryckel syns levens deselve syne offitie nyet te recht volgende synen eedt en can bedienen, dat Syne voors. Excellentie gelieve dinstructie desselfs Neyen tapproberen ende aggreeren, ende dyenvolgende te doen interdiceren, door Syne voors. Excellentie hoeffmeestere, stalmeestere, capiteyn vande garde oft andere die tselve soude moigen aengaen, dat sy heure supposten ende domesticquen, soo van Syne Excellentie als vande garde ende andere vanden ghevolge, verbieden ende bevelen, opde pene van inde ongenade van Syne Excellentie te comen ende voorts gecorrigeert te worden nae gelegentheynt vander saecken, denselven Gecomitteerde Marten Neyen laeten rustelyck ende vredelyck synen last ende offitie volvueren ende volbringen, sonder hem, met woorden oft met warcken, in eeniger manieren te misdoen oft misseggen, door hemselven oft yemanden anders, ende tachtervolghen synen last ende comissie hem byder stadt gegeven, opdat door alsulcken ordre daer gestelt synde, Syne Excellentie ende gevolge mach gedient worden ende de stadt daervan het proffyt genyeten. Actum VI<sup>a</sup> Octobris anno 1578.